

Protocol no. 9
Sezzüda da gövgia, 8 marz 2012, 9.00 – 12.15

Preschaints: Albert Mayer, Andri Poo, Men Caviezel, Dumeng Jann,
 Marianne Werro-Lehmann e Claudia Luppi (protocol)

Protocol

Il protocol no. 8 da la sezzüda da marcurdi, 29 favrer 2012 vain approvà.

52 805.501.01 Meglioraziun cumünala
20avla etappa – Surdatta da lavurs

Il capo salüda il president da l'ameglioraziun generala chi spiega ils detagls a regard ils termins da fabrica ed a regard la proposta da la cumischiun d'ameglioraziun per la surdatta da las lavurs per la 20avla ed ultima etappa.

Ils termins da fabrica sun previs seguaintamaing:

Avrigl 2012: cumanzamaint 2. büs-cha da fabrica:	Lavurs da müraeder per l'installaziun dal filter special Centrala Pradella.
16 avrigl 2012: cumanzamaint 1. büs-cha da fabrica:	Lavurs sauaziun ed electrificaziun stalla in Sot Crusch, access prada da la Foppa, via da Plattas.
18 mai 2012: finischiun 1. büs-cha da fabrica:	Part sauaziun ed electrificaziun stalla in Sot Crusch.
15 gün 2012: finischiun 1. büs-cha da fabrica:	Part access prada da la Foppa e via da Plattas.
18 gün fin ca. 1. avuost 2012: 2. büs-cha da fabrica:	Punt nouva da beton in Soblantin.

A la radunanza da preventiv d'eiran gnüts preschantats cuosts da fabrica calculats da raduond fr. 670'000.-- per quista etappa L'uffizi d'ameglioraziun chantunal ha garanti subvenziuns per ün volüm da fabrica da fr. 750'000.--. Tenor las offertas entradas as po preverer da pudair restar suot ils cuosts calculats per quista etappa.

Davo avair tut cogniziun da las spiegaziuns dal president d'ameglioraziun decida il Cussagl cumünal da surdar las lavurs identic a la proposta fatta da la cumischiun d'ameglioraziun seguaintamaing:

1. büs-cha da fabrica: Lavurs d'impressari: S-chavs Sot Crusch, access Foppas, via Plattas ARGE Koch AG / Fabio Bau, Ramosch / Sent	fr. 251'443.00
2. büs-cha da fabrica: Lavurs d'impressari: Lavurs da beton Pradella e punt Soblantin G. Lazzarini SA, Samedan / Scuol	fr. 65'571.00
Metter gio tubs cun suotpassagi da vias (proceder special) Werner Marty AG, Azmoos	fr. 3'680.65
Lavurs d'electrificaziun, stalla Energia Engiadina, Scuol	fr. 19'866.80
Installaziuns sanitarias, sauaziun ARGE Benderer / Stecher / Mayer / Vital, Sent / Scuol	fr. 15'414.40
Lavurs d'inverdir Armon Mayer, Strada	fr. 2'883.35

53 790

PLANISAZIUN DAL TERRITORI
PEB – questunari a regard projects regionals

La Pro Engiadina Bassa fa pro'ls cumüns üna retschercha a regard projects chi füssan degns da gnir portats ed eir finanziats regionalmaing o dafatta surregionalmaing. Ils cumüns sun giavüschats d'inoltrar lur propostas tenor ün schema da priorità fin la mità da marz. Il Cussagl cumünal es da l'avis ch'eir a Sent sajan avantman projects fingià realisats, ma eir da quels amo da realisar chi füssan vairamaing d'interess e d'importanza per tuot la regiun o dafatta sur cunfin, q.v.d. surregional. Sco projects d'interess regional pudessan valair tanter oter las trais etappas d'innaiver da la pista da sömmi. Sco projects surregionals as pudess valütar per exaimpel la sanaziun da la senda dal Quar, o la separaziun dal traiget per peduns e bikers sur il colmen Fenga. Il Cussagl cumünal decida da d'inoltrar la glista cun divers projects a la PEB.

54 810

ADMINISTRAZIUN FORESTALA
Reziahholz GmbH – cumprita aczia

La Reziahholz GmbH es üna cooperativa chi ha per mera d'organisar e coordinar la vendita da laina e da prodots forestals. La cooperativa coordinescha e commercialisescha eir ulteriurs servezzans forestals. Implü as ingascha la cooperativa per la promoziun da la laina dal Grischun e spordscha cussagliaziuns e sustegns ad interpraisas forestalas. Il Cussagl cumünal es da l'avis chi füss d'avantag pel cumün da Sent e seis servezzan forestal d'esser commember da la Reziahholz GmbH e decida da cumprar ün'aczia per fr. 1'000.--.

55 217.503.06

Sanaziun chasa da scoula
Incumbenza e surdatta lavurs 1. etappa, contuorns

L'architecta Seraina Felix ha survgni amo dal anteriur Cussagl cumünal l'incumbenza per ün projet per la sanaziun dals contuorns da la chasa da scoula per ün import da fr. 10'000.-- (cun tet da cuosts). Per eventualas lavurs plü grondas chi pretendan cugnuschentschas da perit vain l'architecta giavüschada da preschantar ün'offerta al Cussagl cumünal avant co surdar la lavur da perit. Implü renda il Cussagl cumünal attent da vulair executar las lavurs vi dals cuntuorns in considerond las ulteriuras sanaziuns vi da la chasa da scoula chi seguan amo.

56 217.503.06

Sanaziun chasa da scoula
Sanaziun tenor projet da la concurenza

La concurenza per la sanaziun da la chasa da scoula chi ha gnü lö l'on passà ha guadagnà il projet da l'architecta Seraina Felix. Il Cussagl cumünal es da princip da l'idea da proseguir culla sanaziun da la chasa da scoula tenor quel projet da concurenza. Il Cussagl cumünal decida da surdar al büro d'indscheners J. A. Känz l'incumbenza da metter insembel, in collavuraziun culla giuria da la concurenza, ün quadern da dovairs per scriver oura la lavur d'architect in basa al projet.

57 830

TURISSEM
Cumischiun turistica

Sün proposta da la schefa da turissem vain la cumischiun turistica reactivada cul böt da pudair discussiunar temas turistics specifics da Sent e da pudair eventualmaing intensivar las activitats e las sportas pels giasts da Sent. Our da quel motiv vegnan reeletas las seguintas personas: Andri Guler (Sent Turissem), Gian Andri Albertini (cultura), Wolfgang Bosshardt (Sur En), Carolin Pua (parahotellaria), Dora Erny (hotellaria).

